

**Date – 31/12/2024**

**Time - 18:30 Hrs**

1. Home Minister Pu K. Sapdanga chuan zanin kumhlui thlan zan leh zanlaia kumthar a lo thlen hunah Krismas anga halpuah leh halmawi hal lo chhonzawm zel turin mipuite a ngen.
2. Kumina ni tawp ber, vawiin khan mipui tam tak kumhlui thlah tur leh kumthar lawm turin an inbuatsaih
3. Ram mipuite kum thar 2025 lawm turin an inpuahchah mek.
4. India chuan kum tharah van boruaka hmeichhe robot zintir a tum.

<><><>

### **HOME MINISTER**

Home Minister Pu K. Sapdanga chuan zanin kumhlui thlan zan leh zanlaia kumthar a lo thlen hunah Krismas anga halpuah leh halmawi hal lo chhonzawm zel turin mipuite a ngen.

Vawiina Akashvani palaiin a kawmnaah Pu K. Sapdanga chuan kumin 2024 Krismas chu muanawm takin hman a nih thu a sawi a. Halpuah leh halmawi khapna mipuiten an zawm that thu leh lawmawm a tih thu a sawi a. Kumtharah pawh sorkar thupek zawm chhonzawm zel turin mipuite a ngen a ni.

Home Minister chuan police leh YMA ten theihtawp chhuaha khawlai fanga halpuah leh halmawi chungchanga sorkar thupek miin an zawm thatna tura an beihna chu a tangkai thu a sawi a. Kohhran hrang hrangin Biak Inah te uar taka an puan thu leh naupang inkhawmna lam thlenga puanzar a nih thu a sawi a. Heng hmalakna hrang hrangte hi mipuiten an zawm avangin lawmawm a tih thu a sawi a ni.

Home Minister chuan zanin chu a bupui, halpuah hal runpui ni thin a nih thu a sawi a. Hemi atan hian Mizoram police te chu hmun 13-ah inthenin Aizawl khawpui an vil dawn thu a sawi a. Police te hi uniform ha leh ha lo an awm dawn thu a sawi a. Dan hmanga sorkarin a khap miau avangin dan kenkawh a ngai tih Home Minister chuan a sawi a, dan bawhchhia te chu dan anga kalpui a ngaih dawn avangin tuman dan bawhchhe lo hram se an duh takzet thu a sawi a. Mithenkhatin zalenna inhupbehsak anga an sawi chu an hriat sual palh liau liau a nih thu a sawi a. Tar chak lo te leh damlote zalenna tura hmalakna a nih zawk mah thu a sawi a. Sorkar hnathawk, sorkar dan kalh zawnga thu tichhuak thin an awm thu sawiin heng mite hi chhui zui zel an nih dawn thu leh sorkar mi te chu fimkhur lehzuat tura a ngen thu a sawi a ni.

<><><>

### **NEW YEAR PREP**

Kumina ni tawp ber, vawiin khan mipui tam tak kumhlui thlah tur leh kumthar lawm turin an inbuatsaih a, Aizawl bazarah pawh sorkar ruahmannain Chanmari leh Zodin Square inkarah lirthei tlan titawpin No Vehicle Zone kalpui leh a ni. Kumin Krismas leh Kum thar vuakveta Aizawl khawpui chhunga mipui bazar, ke a kalte him zawk na'na lirthei tlan lohna hmun No Vehicle Zone ruahman chu vawiin hi a ni thumna niin Krismas hma ni hnih chhung kalpui a ni tawh bawk a. Mi tam tak kein bazarah an kal a, Krismas hmaa No Vehicle Zone nena khaikhinin mipui hi an tlem phah chuang lo tih Akashvani palaiin a sawi.

Zanin hi kum khata zan hnunung ber a nih avangin kohhran hrang hrangte chuan kumin chhunga an kohhran member kalta te pualin zan inkhawmah hun an buatsaih a. Kumin chhunga thite chanchin chhiar chhuakin sunna hun bik siam a ni a. Kumin chhunga thi ta chhungte pawh biak-in chhungah thutna bik siamsakin urhsun takin hun an hmang leh dawn a. Hei bakah hian kohhran tam tak chuan kumhlui thlah kum thar lawm na'n a bik takin zanlai inkhawm an buatsaih dawn bawk a ni.

Champhai District ah pawh mipuiten hlim leh ralmuang takin kumhlui an thlah mek a, District thuneituten ruahmanna chi hrang hrang an siam a. Vawiin khan mipuite'n kumhlui thlahna leh kumthar lawmna turin bazar leh dawr hmunahte chakkhai an lam a, chhang zuar leh Sa lam chi zuarte'n dawrtu an ngahin Krismas urlawk ni aiin kumhlui thlah ni ah ei leh in zuartute'n an inhralh tam zawk thu an sawi a ni. Champhai District-a police station hrang hrangah mipuite himna tur a duty dan tur

leh pawikhawihute rang taka man chhuah an nih theihna turin ruahmanna siam a ni a, Champhai khawpui bikah chuan police ten duty post 7 siamin an inzarpharh dawn a ni.

Kumhlui thlaha Kumthar hmuak turin Lawngtlai District mipuite boruak nuamtak hnuaiah an inbuatsaih mek a. Kumtina an lo tih thin angin Lawngtlai khawpua thalaite chuan kawngpui dung leh hmun remchang laiah te kum 2024 thlah na'n ni tla tur an thlir liam leh a, he'ng hmun te hi buaina chhuak palh thei vengin Police leh Young Lai Association ten an vil reng bawk. He'ng Thalai pungkawmte hi Lawngtlai zaithiamten an awi reng bawk. Zanin hian Kohhran hrang hrangte chuan kumtawp inkhawm neiin, kumin chhunga an Kohhran mi chatuan ram pante sunna hun an hmang dawn a, kumthar hmuakin zanlai inkhawm an buatsaih ang. Sorkarin halpuah leh halmawi lam chi hal a khap chu khau takin Lawngtlai Police te chuan an kengkawh dawn a, Central YLA pawn Branch YLA te chu sorkar tha tichak tura tan la turin a lo hriattir tawh bawk.

Lungleiah pawh kumhlui thlah tur leh kum thar lawm turin mitin an in puahchah a, zan lam Kohhran programme-ah kumin chhunga member thite sunna hun hman a ni ang. Chhungkua leh thianho a hun hman khawm tum an awm fur bawk. Sorkar in halpuah leh halmawi kaihhnawih a khap chu zawm a hlawh dawn em hriat ni lo mahse kum dangah chuan tun ang hun chhunah leh nizan lamah te khan halpuah hal ri hriattur a awm thin a, vawiin lamah chuan tun thleng hian halpuah hal ri hriattur a la awm lo.

<><><>

#### **MPCB**

Mizoram Pollution Control Board chuan Mizoram chu zanin kumhlui thlah zanah mipuite thuawihna avangin India ram pum huapa halpuah leh halmawi hal tlem ber state a nih ngei an beisei thu an sawi. Mizoram Pollution Control Board hotute'n Akashvani News Aizawl an hrilh danin Mizoram chhung, a bik takin Aizawlah kumin krismas urlawk zanah halpuah leh puak thei thil hal an awm mang lo an ti a, hei hi sorkar thuchhuak mipuiten an zawm that vang liau liau a nih thu sawiin zanin kumthar lawmna leh kumhlui thlahna hunah pawh Mizoram chu krismas urlawk zan anga halpuah leh halmawi hal tlem berna state a nih ngei an beisei tlat thu an sawi. Mizoram Pollution Control Board hotute chuan halpuah leh halmawi hal loh intih hmuh kawngah Zoram mipuite chuan hna ropui tak an thawk tih sawiin Police leh khawtlang hruaitute inpekna pawh a fakawm takzet thu an sawi bawk.

Mizoram Pollution Control Board hotute chuan Krismas lawmna ruai thehna atan Kohhran tamtakin hman khat daih plastic leh a tlukpuite hmang lovin tawih ral thei leh sil fai theih thleng leh no an hman chu fakawm an tih thu an sawi a, kumthar lawmna ruai buatsaih kawngah pawh Kohhran tinte hman khat daih plastic leh a tlukpuite hmang lova, sil fai theih emaw tawih ral thei emaw thleng leh no hmang hram hram turin Mizoram mipuite an ngen tak meuh meuh thu an sawi bawk.

-<><><>

#### **CYMA**

Central YMA Vice President leh Kumpulan Chairman Professor Lalnuntluanga'n zanina kumhlui thlahna leh kumthar lawmna atan halpuah leh halmawi hal kawnga sorkar thuchhuak zawm theuh turin mipuite a ngen.

Akashvani Correspondent nena an inkawmnaah he thu hi sawiin Professor Lalnuntluanga chuan, India ram chu sakhuana la urhsun ram a nih angin sakhaw hunpuiah halpuah leh halmawi hal an tam thin thu a sawi a, India ram boruak chu hunpuiah a bawlhhlawh em thin avangin supreme court pawh a inrawlh hial thu a sawi a, heng halpuah leh halmawi hal hian mihringte hriselna a tichhhiat avang leh environment atana thil thalo a nih avangin mi tinte sorkar thuchhuak zawm theuh tura a ngen thu a sawi bawk.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

## **THE PEOPLE ACROSS THE COUNTRY ARE ALL SET TO WELCOME THE NEW YEAR 2025**

Ram mipuite kum thar 2025 lawm turin an inpuahchah mek. Delhi khawpuiah chuan kumhlui thlah ni wawiin khan kawthler a lun hle a, thlen buk, chaw dawr leh khawpui chhunga punkhawmna hmunte pawh a lun hle a ni. Delhi khawpuiah hian mipui himna tur leh muanawm taka kum thar hmuah thlen a nih theihna turin Police leh sipai sing 2 chuang duty tir an ni.

Kum hlui thlahna atan hian thlen buk, chaw dawr, zu dawr leh sumdawmna hmun tam tak chu a man tihtlawm a ni a. Delhi khawpui leh a chhuntu lamlian sirte chu rawng chi hrang hranga eng thei hmanga cheimawi a ni a. Bazar lian deuha bazar danah ruahmanna felfai tak siam a ni a, thlalakna thahem tak kam a ni bawk. Rel tlan dan tur pawh mumal taka duan a ni bawk.

<><><>

## **INDIA IS READY TO SEND FEMALE ROBOT INTO SPACE UNDER THE GAGANYAAN MISSION IN COMING YEAR**

Union Minister of State for PMO, Atomic Energy and Space Dr Jitendra Singh-a chuan kum 2024 hi Van lam chanchin zirna huanga India tana kum pawimawh a ni a ti.

Wawiin tlaia New Delhi-a chanchinbu mite a kawmnaah Jitendra Singh-a chuan kumin kumtir ni hmasa berah khan XPoSat kahchhuah a ni a, Aditya L1 Mission-in a zui a, chu'ng hlawhtlinnate chu kumin August thla khan National Space Day-ah lawm a ni a, nizan lamah ISRO chuan SpaDex mission hlawhtling takin a kapchhuak leh a ni a ti.

Dr Singh-a chuan kum thar eng hun emawa peih hman tur hmeichhe robot buaipui mek a nih thu a sawi a, chu chu Gaganyaan mission hnuaia van boruaka zintir tura ruahman a ni a ti.

Gaganyaan mission leh India's Space Station program-ah hian a thlunzawmna space docking system hman tum a ni a. He thil hi a pumhlumin India pumchhuak liau liau a ni a, a hmingah pawh Bhartiya Docking Technology vuah a nih thu Minister chuan a sawi.

<><><>